



Nicolaus natus est in Alsatia patre Georgio ex nobili familia ab Hatstatt, anno 1510. Is cum prima literarum fundamenta iecisset, animum ad armorum studia conuertit, atq; militarem disciplinam facile percepit. Inde uerò cum adoleuisset, prima belli tyrocinia regi Suetiæ præstitit, atq; in Belgis & partibus Septentrionalibus per aliquot annos sua arma circumtulit, & peditum ordines duxit. Postea uerò in patriam reuersus, Francisco Galliæ regi militare cœpit, atq; sua præsentia eius partes plurimum adiuuit. Itaq; cum in Germaniã rediisset, atq; Carolus Imperator in bello Smalkaldico uictor extitisset, Nicolaus anno millesimo

quingentesimo quadagesimo octauo cum alijs Gallicis capitaneis Augustã pertrahitur, ut Cæsaris sententiam audiret. Ibi cum sese egregiè excusaret, atque multí principum & nobilium, ob præclaras huius uiri animi & corporis uirtutes, intercederent, liberatus, atque à Carolo Cæsare in gratiam receptus fuit.